



# Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 8

Yangia anidakangma :

f Tir Yimyim

ig tiryimyim@aolima

yt tir yimyim

TAPAK 3

Smith lenisüba nung Australia team India den ODI asayatsü

Stalin-i PM Modi dang SLnungi angopurtem anir arutsü mepeshi

VOL. XX NO. 152 (ADOK 152) DIMAPUR RASEMNÜ (WEDNESDAY)

METSÜREMI (MARCH) 15, 2023

₹ 5.00

## Mar 20 nü 14 buba NLA mezüngbuba session alitsü

**Dimapur, March 14, 2023 (TYO):** Nagaland nung Nationalist Democratic Progressive Party (NDPP) aser Bharatiya Janata Party (BJP) teloktep sorkar akümba sülen Governor La Ganesan-i 14 buba Nagaland Legislative Assembly (NLA) indang mezüngbuba session alitsü ayongzükogo.

Constitution of India nung Article 174 indang Clause (1) nung tashi agüja aliba ama Nagaland Governor Ganesan-i March 20, 2023 nü 14 buba NLA indang mezüngbuba session alitsü jazüker. Nagaland Legislative Assembly Hall, Kohima nung anepdang 9:30 ako nungi 14 buba NLA session tenzüksü.

## Mokokchung Municipal election atema metetdaksür

**Dimapur, March 14, 2023 (TYO):** Mokokchung Town Municipality indang election atema Nomination file asütsüba osang metetdaksüogo.

nikongdang 3:00 ako tashi nung Nomination Papers agütsütsü akok ta pai ashi. April 12 & 13, 2023 anogotem ADC (Hq) & RO Mokokchung Municipal Council nung Nomination Papers reprangtsü aser candidate mesüra pa/la indang election agent-i April 24, 2023 nikongdang 3:00 ako tashi nung tenüng meyipa agütsü akok ta Chumlamo Humtsoe-isa metetdaksüogo.

Mokokchung Town Municipality kübok Ward No. 1,2,4,5,7,8,10,11,13,14,16 & 17 aser tetsirtem nem lezmüksüba Ward No. 3,6,9,12,15 & 18 indang election agütsü, ta Addl. Deputy Commissioner & Returning Officer, Mokokchung Municipal Council, Chumlamo Humtsoe-i ashi.

ULBs election agütsüba kümra May 16, 2023 anepdang 7:00 ako nungi nikongdang 3:30 ako tashi polling asütsü ta paisa shisem.

Anungji election nung toktepsü candidate temi April 3, 2023 nungi April 10, 2023

## Nagaland nung G20 Business Summit atema renemer

**Dimapur, March 14, 2023 (TYO):** Nagaland Chief Secretary, J Alam, IAS lenisüba kübok Nagaland nung April 5, 2023 nü G20 Business Summit alitsü atema senden ka menokogo.

ayongzüksü metetdaksü. Nagaland nung G20 Business Summit alidang linük balala nungi teshimtet nübo 80 nungi 100 shi adentsü imlar.

Mongulbarnü amenba senden nung J Alam-i yimya tajungtiba nung Nagaland sayutsü atema ayongzük aser sorkar department tem aser sendaktepa alirtem dang Business Summit takok ngua

18 buba G20 Heads of State and Government Summit ji New Delhi nung September 9-10 anogotem amongtsü. Iba ya küm piyong G20 maparen aser sendentem amenba tembangba sentong ka asütsü.

## Assam HSLC question papers aika 'leak' asü

**Guwahati, March 14, 2023 (Agencies):** Tawa Assam HSLC indang General Science paper temai adokba nung kaketshir aser tesayur aika dena. Iba subject indang question paper ji Rs. 500 nungi Rs. 2,000 tashi ayok aser social media nunga belenshi.

tatidang athi. March 30, 2023 nü iba tatidang agütsü osang metetdaksüogo.

"Iba maparen nung shilem agiba kaketshir teimba ka Salt Brook Academy, Dibrugarh nungi liasü aser iba sülen Jagun o Dhemaji nung alirtemi belenshi" ta Dibrugarh Superintendent of Police Shwetank Mishra-i ashi. Iba ken o dak sendakba nung kaketshir 8 aser nisung ka pua lir, ta Mishra-i ashi.

General Science question paper temai adokba ken o adoka lia ano Mathematics exam question paper temai adokba ken o ka adokogo.

Kaketshir kari Rs 500 agi question paper alizük aser karibo angati dang angu. Parnok ya first-year commerce aser science students lir, ta paisa shisem.

Dhemaji district nung HSLC candidate kati anogo asem lia WhatsApp group ka nung Mathematics question paper angu. Mathematics tatidang agütsü anogo ishika lia 'Friends' ta ser WhatsApp group ka nung ni dendaktsü. Iba telok nung tebur 7 liasü aser parnoki kü dangi question paper yok. Parnoki kodaser kü indang contact number angu'ar ni memetet" ta HSLC kaketshiri ashi.

Assam HSLC examination indang General Science subject indang question paper social media nung temai adokba sülen

"Ni anogo asem lia WhatsApp group ka nung Mathematics question paper angu. Mathematics tatidang agütsü anogo ishika lia 'Friends' ta ser WhatsApp group ka nung ni dendaktsü. Iba telok nung tebur 7 liasü aser parnoki kü dangi question paper yok. Parnoki kodaser kü indang contact number angu'ar ni memetet" ta HSLC kaketshiri ashi. Maths indang question paper anguba sülen iba WhatsApp group agien, ta paisa ashi.

(Maneni tapak 2 nung...)

## Nagaland sorkar mapa inyaker temi NPS agientsü akhanger



State Civil Secretariat kima CANSSEA president Dr Ilang-i osangbener den jembiba angur.

**Kohima, March 14, 2023 (TYO):** Mongulbarnü Confederation of All Nagaland State Service Employees' Association (CANSSEA)-i New Pension Scheme (NPS) agiener Old Pension Scheme (OPS) tenzüksütsü atema takhangba agüja lungkak aitogo.

people", "Constitute the 8th Central Pay Commsion", "Release all DR/DA including confiscated arrears" aser "Pension is my right" amala tezülubatam amer lungkak ait.

All India State Government Employees Federation (AISGEF) aser Central Government employees & Workers (CGEW) ajanga ayongba sülen anidaka Mongulbarnü CANSSEA aser Nagaland National Pension System Government Service Employees Forum (NNPGSGSEF) züngsem noklang aikati State Civil Secretariat kima nung lungkak aitogo.

"AISGEF aser CGEW ajanga onük tenet takhangba agütsüogo saka CANSSEA-ibo New Pension Scheme (NPS) agientsü atema dang temulung agütsür kechiyong iba nung state sorkar mapa inyaker 40,000 shi dena lir" ta CANSSEA president Dr Ilang-i ashi.

Parnoki "annual PFRDA Act, Scrap NPS", "NPF is fooling

Iba Act ya state sorkari dang masü saka Centre sorkari agientsüla, kechiyong 2013 küm Pension Fund Regulatory and Development Authority (PFRDA) Act agizüka lir. Iba ajanga NPS system ajunga ketdangüsü repranger anungji Parliament nung Act agientsüla,

ta Dr Ilang-isa ashi. "Old Pension Scheme ya kanga dang junga latetba sorkar indang pension scheme ka lir saka New Pension Scheme yabo privatized company ka lir aser sorkar mapa inyaker temi sen koleni aoer mesüra pension sen angutsü-mangutsü'ar memetet" ta paisa metetdaksü.

"Onoki linük ka, pension ka akhanger aser old pension scheme dang agütsüla" ta paisa shisem.

State pezü- Chhattisgarh, Jharkhand, Punjab aser Rajasthan nungbo NPS agienogo anungji Nagaland-ia iba scheme agientsüla, ta CANSSEA president-isa metetdaksü.

"Centre-i onok nem temeten magütsü tashi onoki raratsü" ta Dr Ilang-isa nenshia metetdaksü.

## NDPP Phek region-i non-NDPP/BJP party tem medendaktsünür

**Kohima, March 14, 2023 (TYO):** NDPP-BJP teloktep sorkar nung nübo peria dang lir anungji tanga political party tem medendaktsü tajungba ta Nationalist Democratic Progressive Party (NDPP) Phek Region-i metetdaksüogo.

Parliamentary Affairs Minister, Nyuthe nem New & Renewable Energy and NSDMA Advisor aser Khamo nem CAWD & Taxes Advisor mapatem lezmüksüogo.

Phek district nungi NDPP MLA asem- K G Kenye, Z Nyuisietho Nyuthe aser Kudecho Khamo nung nem tenüngsang agütsüba sentong ka agidang NDPP Phek region president Neikhrolo Khalo-i iba osang metetdaksü.

Phek district nungi tanga party ka danga sorkar nung medendaktsütsü NDPP Phek Region-isa ashi.

Kenye nem Power and

Phek district nung constituency 5 lir aser iba nung NDPP-i menden 3 nung takok angu aser 2 nung tamakok angu. Tamakok angurtem rongnung Pfutsero A/C nung taoba planning & coordination, land

revenue and parliamentary affairs minister Neiba Kronu dena lir.

"Phek district nungi NDPP MLA asem nem tenüngsang agütsür aser nenoki Naga nung aser talisa district atema inyaktsü imlar" ta Phek region president Khalo-i ashi.

NDPP-BJP teloktep menden peria dang lir aser March 20 nü tezüngzüktep agiba sülen maparen tenzüksü ta Minister K G Kenye-i ashi.

"Onoki sorkar nung tajungtiba agüja inyaktsü aser constituency punguprong atema inyaktsü" ta paisa ashi.

## Nagaland nung nisung 723 dak yimra mesükba shirang putetogo

**Dimapur, March 14, 2023 (Agencies):** Nagaland nung nisung 723 dak tango junga mesashitet shirang putetogo ta Mongulbarnü Nagaland Health and Family Welfare department-i metetdaksü.

mozü kidang anioker ajak department-i tenük yoka reprangdar. Tesüiba hopta pungu tsünda Nagaland nung Covid-19 putetba osang kecha mali. Nagaland nung tatamsa Covid-19 putetbaji February 11, 2023 nü liasü, ta H&FW department-isa ashi.

Ano, nisung 37 tashi tango junga mesashiteti kanga timtemer saka item shirang atema laboratory nungi osang kecha mangu lir, ta parnoki ashi. Tango sashiba nung timtema

linük kübok tesem aika nung seasonal flu ta ajaba agi shiranger aika lir, ta parnokisa ashi.

Covid-19 dena Influenza A (H1N1, H3N2, etc.) tashidaktem ya lokti nung mesüra takdang tila nung nisung aika mena lia hajidang aser aketba ajanga menateper. Anungji hajidang mesüra aketdang romal, tekütsü mesüra tissue agi teni nembangtsüla aser lokti alidak mask enoktsüla aser mapang shia teka metsüksüla, ta department-i metetdaksüogo.

# Global Naga Forum-i Solo Chiu yimdak teyari agütsü



**Dimapur, Metsüremi/March 14 (TYO):** Myanmar nung Naga nung yimtsüng, Solo Chiu nung kitsük-kirong lendong ataloker alidak teyari agütsü ayongzüka ana Global Naga Forum ajanga yangji yimtaklar yaritsü asoshi GNF Relief Mission inyaka liasü.

GNF Co-Convenor and Chair, GNF for Nagas in Myanmar, Prof. Rosemary Dzuvichu-i anir GNF Advisory Board member Abeiu Meru, Miriam Rengma, KevithoKera, Azo Wetsah, Chungtin Khamniungan aser Mutsoi Khamniungan nungertem Kohima aser Dimapur nungi teyari oset quintal 200 bener March 11, 2023 nü Pangsha yimtsüng atong.

Kasa anogosa nikongdang Solo Chiu yimtsüng nungi lenir 11 aser ano New Pangsha aser Dan yimtsüngtem nungi lenirtem den senden ka mena kitsük-kirong lendong ajurua alirtem nem teyari osettem bener otsütsü asoshi jembia liasü.

March 12, 2023 nü GNF Relief team ya Solo Chiu yimtsüng atong aser parnok meina Chairman New Pangsha Village, Chairman Dan Village, Solo Chiu village Angh,

Khamniungan Tribe Council member, Solo Village Council lenirtem aser arütsü anatsülen nungi lanur volunteers tem oa liasü.

Iba mapang mi agi rongdoker aliba Angh-bar kima GNF nem chiyongtsü renemja liasü aser Solo Chiu village Angh-bai GNF aser tetenlar ajak dang pelaba lemsatepa liasü.

Arütsü agi pilar meta talang nung liaka Naga nung kibong ka ama meimtepba ya tatishitsü tajung lir, aser iba yongji meta talang nungi süaka kanga nüngdaka aliba teyari osettem bener arütsü, ta pai ashi.

GNF teyari osettem ya Pangsha nungi Bolero truck pongu nung bener ao aser yangji jang seret 3750, dal seret 300, metsü seret 350, tanurtem atema amtsük aser sapon, tetsür, tebur aser tanurtem atema aben-süoshi aser tsüngsem, blankets, kidang amshiba oset, chipo-aonpo, marok, yipten nung alemba sü aser pillow amala liasü.

Solo Chiu yimdaklar yaritsü ayongzüka ama senotsü aser ali rongsen balala agi telangzüba agütsür ajak dang pelaba lemsateper, ta Global Naga Forum sangdong ka ajanga ashi. Onoki Poumai Naga Baptist

Churches Association, Poumai Union Kohima, Mao Union Dimapur, Don Bosco College Kohima aser Don Bosco Higher Secondary School Kohima, staff aser students, Salesian College Dimapur nung students, Khedi Baptist School staff tem, GNF züngsemtem aser kinunger aser tembar temi meta talang nung Naga nung yimtsüng mi agi rongdoker aliba asoshi teyari agütsür ajak dang kanga pelar, ta ashi.

Pangsha tashi teyari osettem bener aotsü atema police truck agütsüba atema DGP Nagaland dang pelar.

Solo Chiu yimtsüng tashi aodang yaritepba atema Hangchiu GB, New Pangsha; P.Pencho, Chairman, New Pangsha Village Council; Mulai, Chairman Dan village, ITC Dan area; Khunyu member, Khamniungan Tribe Council nung dang temolung taroktiba nungi pelar.

Maneni Dr. Putschong Thai, Nagaland Police driver Wati Ao, Lanu Dy. Commandant, NAP Battalion, Tuensang aser ano shirnokisa iba mission asoshi sarasademtsüogo, nenok ajak dang kanga pelar, ta Global Naga Forum ajanga ashi.

# DC Kohima ajanga kisü-jensür dang metetdaksür

**Dimapur, Metsüremi/March 14 (TYO):** Deputy Commissioner, Kohima, Shanavas C ajanga sangdong ka nung ashiba agi, nüburtem lendong ajurutsüsa kisü-jensüba oset tem tema nung yua aliba tesem aika nung ajitetogo.

Kisü-jensüba tesem nungi jana/aoyi/mokozü/ola adokba ajanga ola aser mopung menentsür aser yimti menenja jangramatem aser tenükshitsü maket kumdaksür, ta sangdong ajanga ashi.

Anungji nüburtem kumzüka ayutsü tejangraba nung kibur temi kisü-jensüba tesem merenem tashi Green Shade Net/Tarpaulin/CGI sheet agi meyibanga ayutsü metetdaksür, ta sangdong ajangasa ashi.



**Kohima, Nagaland, India**  
M3HJ+74V, NH29, Nagaland 797121, India  
Lat 25.678073°  
Long 94.080026°  
14/03/23 02:10 PM GMT +05:30

NCC Group HQ, Kohima kübok 1 Nagaland Girls Bn NCC Kohima nung affiliate süa aliba Sazolie College, Jotsoma nungi instructor ana aser NCC Cadets 15 den ANO ka dena telok kati March 15, 2023 nü Phezu, Jostoma nung aliba Kohima Orphanage and Destitute Home semdanga yangji aliba tanurtem den sensaksem kaa liasü. Cadets temi tanurtem nem jang-o-tzü, cooking oil, sapon, detergent powder amala osettem lema agüja liasü. Cadet temi NCC nung aliba otsü lemsateper aser tanurtem dang meranga azüngtsü ajungmesoa liasü.

# AR-Perennung sentong balala ayongzüker

**Dimapur, Metsüremi/March 14 (TYO):** IGAR (North) kübok Assam Rifles, Jalukie Battalion ajanga March 14, 2023 nü Peren district kübok Upper Jalukie Village nung aliba Govt. Primary School nem mini tablets 15 agütsü aser 'Say No to Tobacco' campaign ayongzüka liasü.

Iba sentong nung tesayur aser kaketshir tem densema yimdaklar nisung 75 shi arua shilemagia liasü.

Assam Rifles, Jalukie Battalion ajangasa March 13, 2023 nü Peren district kübok Kipeuzang yimdak 'Nasha Mukh Bharat Abhiyaan' onük nung awareness lecturer agütsü aser Ndunglwa yimer den lungjemer mürekmejuba sentong ka agia liasü.

Iba anogo school ketdangsur nem Assam Rifles temi Assam Rifles Civic Action Project kübok Tablets 15 aser danga osettsüset kar agüja liasü. Kasa mapang tesayurtem dang oset balala amshiyim sayua liasü.

Temesepba mozü achi-ajemba tebilemtsü dak sendakba nung rangloker nüburtem nem 'Nasha Mukh Bharat Abhiyaan' indang awareness ya agüja liasü.

Parnoki tesayur aser kaketshir tem dang shisaliok atema tablets amshitsü yimyattem sayu.

Parnoki iba mapang temesepba mozü ajanga temang aser lokti nem timtem agütsüba indang rateta shia liasü.

Assam Rifles temi kaketshir dang mapa bushiba mapang Information Technology amshitsü indang rateta ashi.

Yimdaklar dang temesepba mozü ayokba aser achi-ajemba indang osang parnok nem agütsütsü ayongzüka liasü. Kasa mapang Assam Rifles nung Tradesmen atema vacancy adoka aliba indang metetdaksü aser Security Forces nung adentsü ajungshia liasü.

Kasa anogo Assam Rifles temi Old Jalukie aser Gaili Namdi yimtsüng nung 'Say No to Tobacco' campaign ayongzüka liasü. Iba mapang parnoki awareness lecture agütsü aser kibong mesüra lokti nung moko achirtem yaritsü lenmag sayua liasü.

Iba sentong ajanga yimdaklar nisung 35 ajangzüka liasü.

# GPRN/NSCN Tatar Hoho Budget Session March 22 nü amentsü

**Dimapur, Metsüremi/March 14 (TYO):** GPRN/NSCN Tatar Hoho Budget Session ya March 22, 2023 nü amentsü, ta NSCN/GPRN indang MIP (Ministry of Information and

Publicity) sangdong ka ajanga ashi.

Agenda lira Tatar Hoho Secretary nem March 18, 2023 tashinung agütsütsüla, ta sangdong ajangasa ashi.



Naga Council Dimapur tiri anir ketdangsur temi Mongulbarnü H. Tovihoto Ayemi, Advisor, Tribal Affairs & Election Department, Nagaland par kidang ajurua Dimapur district terenlok atema ken o balala jembia liasü.

# EE PHED Urban Division ajanga nübur dang ayongzüker

**Dimapur, Metsüremi/March 14 (TYO):** Executive Engineer, PHED Urban Division Kohima ajanga nüburtem dang sangdong ka nung ashiba agi, tziungsarusa mapang tenzüka den ano küm ishika tziungsang-mopung melenshia aruba ajanga tzi sources kanga ajema kumer supply system nung kongshir.

Anungji PHED consumer aser nüburtem dang tzi supply junga magütsüba asoshi aremzüksü ayongzüker, ta ashi.

Ano department ajanga nüburtem dang department den maneni yaritepa nübur tenzüka nung tajungba inyaksü mepishir, ta sangdong ajangasa ashi.

# Assam HSLC question papers... (TAPAK 1 NUNGI...)

"WhatsApp group nung Lakhimpur aser Bokulguri nungi kaketshirtem dena liasü aser parnoki question paper atema kü dang sen memeshi. Iba telok nung aliba kaketshirtemi subject ajak indang question papers nguogo ta ashi" ta kaketshirisa osangbener dang ashi.

media nung question paper belenshi ta osang angazüker.

Ano, March 3, 2023 nü Barpeta district nungi English subject question paper temai adok ta ashir.

March 6, 2023 nü Mathematics tatidang agia liasü aser Cachar district nung tatidang tenzüker minute 15 shi lir social

Ajisüaka, Secondary Education Board of Assam (SEBA) secretary & exam controller Narnarayan Nath-ibo media osangtem ya tiyazü aser kuli kecha mali ta metetdaksüogo.



New Delhi nung Parliament Budget Session amenba mapang Adani ken o bushisüngdangtsü atema joint parliamentary committee (JPC) ka tentettsü khanga AAP aser BRS Mp temi Mahatma Gandhi kerak yanglu anasa longkak aitba noksa nung angur.

### Gandhi dang tatok meshitsü akhangba atema Cong MP-i sorkar aitsü

New Delhi, Metsüremi/ March 14 (Agencies): sülen Rajya Sabha 2:00 ako tashi magi atatsü telemtetba agia liasü. Kasa mapang nung House lenir Union Minister Piyush Goyal-i, Gandhi-i Parliament mezüngmeshiba jembio go ta ashi, ajsüaka pa tenüng metetshi liasü. Hombarnü Goyal-i Gandhi dang tatok meshitsü akhang aser ashiba agi, "Ni tanep ken o tongtibang ka benoker. Congress lenir tejen ka bendangleni ao aser India nung democracy lendongbang nung lir ta ashi aser Europe nung aliba linüktem aser US dang jenjang tapet agitsü ayongzüka liasü. Iba amala nisung ya House nung aitsütsü langa lir."

Parliament nung Budget session tanabuba leg Hombarnü tenzüka ajsüaka Rahul Gandhi-i bendangleni oa o jembiba dak sendakba nung BJP aser Congress party na tsünga mangatettep adokba ajanga junga magitet. Bodhbarnüa, sorkari tatok meshitsü akhangba dak sendakba nung opposition züngsemtemi ken o ashishiba

### Stalin-i PM Modi dang SL nungi angopurtem anir arutsü mepeshi

Chennai, Metsüremi/March 14 (Agencies): Anogo ishika tejakdang Sri Lankan Navy-i angopur 16 apuba dak sendakba nung Tamil Nadu Chief Minister M K Stalin-i Ato Kilonser Narendra Modi dang item angopurtem aser parnoki angopudang amshiba rong 102 sota aliba chiokdaksütsü atema jenjang tapet agitsü mepeshia metetdaksüogo.

"Ita ka tsünga tang agi taseben buba India nunger angopurtem Sri Lankan nationals/Navy-i puogo aser naia meteta lir, item angopurtem ya taküm libalirotsü atema angopubadak metaloker alir aser ibala tatalokba mapang shia atalokba ajanga item sensaker angopurtem libaliro nung kongshir aser parnok mulung nung tetsübu aيتدaksür," ta pai shiti nung ashi.

"Linük nungi angopurtem traditional fishing rights teti atema kümzüka ayutsü aser iba amala tatalokba ya mapangshi mataloktsü atema jenjang agitsü atema nai ken o nung teka amoka inyaksü mepeshir," ta shiti nungsa shia lir.

Tang tashi nung Tamil Nadu nunger indang angopudang amshiba rong 102 Sri Lanka nunger ket nung lir aser parnoki rong trokbo chiokogo, ajsüaka tang tashi India metongi lir. "Anungji Sri Lankan Navy-i pua aliba angopur 16 prongla aser angopudang amshiba rong 102 takaratiba nung chiokdaksütsü atema jenjang tapet agitsü mepeshir," ta CM M K Stalin-i ashi.

Sri Lankan Navy-i March 12, 2023 nü angopur 16 aser parnoki amshiba mechanised fishing boats ana apuba indang metetdaksa PM Modi dangi shiti ka züluba mapang Stalin-i, rong ana ya Nagapattinam aser Pudukkottai District nung angopurtem meyong lir ta ashi.

Taoba mapanga CM-i iba ken o ya External Affairs Minister S Jaishankar nem metetdaksüogo aser pai iba ken o ya SL ketdangsurtem den benoka sensaksemogo. Centre-i jenjang agiaka iba amala tatalokba ya maneni ataloker.

### Mopung tamajungtiba linüktem rongnung India 8buba nung lir

New Delhi, Metsüremi/ March 14 (Agencies): 2022 küm alima nung mopung temenentiba linüktem rongnung India jenjang tibuba nung lir, ta osang ajanga metetdaksüogo.

asütsü nüngdaker, ajsüaka India nung 2022 küm annual average PM2.5 level 53.3 µg/m3 liasü, koba safe limit dang nungi tersü agi timba lir aser 2021 küm average 58.1 aliba dang nungi tera agi dang tajemba lir.

131 nungi shilem 90 bo annual PM2.5 guideline value dang nungi timba liasü.

2022 küm Pakistan kübok Lahore yimti ya metropolitan area ajak dang nungi temenentiba liasü. Iba yimti ya 2021 kümbo jenjang 15buba nung liasü.

Taoba küm India jenjang terkabuba nung aliba jenjang asem asepzüka alur taküm tibuba nung lir aser 2022 küm mopung temenentiba linüktem rongnung Chad, Iraq, Pakistan, Bahrain, aser Bangladesh tamajungtiba lir.

India nung Rajasthan kübok Bhiwadi yimti ya ajak dang temenentiba yimti lir, kong annual PM2.5 levels, 92.7 µg/m3 lir aser report nung shisema aliba India nunger yimtitem annual PM2.5 levels dang nungi teneben agi timba liasü.

Central aser South Asia kübok aliba yimti tibo alima nung mopung temenentiba yimti ter rongnung densema lir.

Osang ajangsa Central aser South Asia region nung India aser Pakistan na air quality tamajungtiba linük liasü, kong Bangladesh, Iran, Kazakhstan, Kyrgyzstan, Maldives, Nepal, Sri Lanka, Tajikistan, Turkmenistan, aser Uzbekistan nunger densema lir. Iba tesem nungi yimti tekui dang 2022 küm annual PM2.5 concentrations ajangzükteta WHO Guidelines sülen anidaktetogo.

Annual world air quality report ya Swiss air quality technology company IQAir-i sangdonga liasü.

World Health Organization (WHO) guidelines kübok annual average PM2.5 level ya 5 µg/m3 mesüra tekübokba

Australia, Estonia, Finland, Grenada, Iceland aser New Zealand ta linük trok dang WHO indang safe limit küboki iogo aser bushisüngdang nung densema aliba linük aser tesem



Nashi chang shibelenba ken o dak sendakba nung police-i pur aliba TMC lenir Anubrata Mondal indang chartered accountant, Manish Kothari New Delhi nung Enforcement Directorate (ED) office-i aruba noksa nung angur.



Rashtrapati Bhavan, New Delhi nung Indian Revenue Service and Assistant Executive Engineers of CPWD (2020 and 2021 batches) batch 76buba kübok Officer Trainees tem den tir Droupadi Murmu senden ka amenba noksa nung angur.

 <p>बैंक ऑफ बड़ोदा Bank of Baroda</p>	<p><b>NAGA BAZAR BRANCH</b> Razhu Point, Kohima- 797001, Nagaland, Phone- 0370-2291717 Email: vjkohi@bankofbaroda.co.in</p>
<p>[Rule 8(1)]</p>	
<p><b>POSSESSION NOTICE (For Immovable Property)</b></p>	
<p>Securitization and Reconstruction of Financial Assets and Enforcement of Security Interest Act, 2002 aser Security Interest (Enforcement) Rules, 2002, Section 13 (12) Rule 8 kübok Bank of Baroda, Naga Bazar Branch (Kohima) Branch indang Authorized Officer ka ama 30.01.2021 nü sen apur <b>MR. CHINNY MAGH (BORROWER)/ MRS. NAONI BUKH, W/O CHINNY MAGH (GUARANTOR)</b> na tashi nung tenati apuba <b>sen 48,58,946 (Forty Eight Lacs Fifty Eight Thousand Nine Hundred Forty Six Only)</b> lir aser osang agizükba sülen anogo 60 tsünga aotsü metetdaksür. Sen apuri sentsüh maotet asünung sen apur aser nürburtem dang Act kübok Section 13, sub section (4) aser Security Interest (Enforcement) Rules 2002 kübok Rule 8 nung tashi agüja aliba dak ajemdaker <b>2023 küm March 13</b> nü teküboklen agüja aliba kiojen/ali agiba metetdaksür. Sen apur aser nürburtem dang teküboklen agüja aliba kiojen/ali dang sendakba nung kecha inyaksangshi masütsü metetdaksür, ajita mesüra Bank of Baroda-i sentsüh <b>48,58,946 (Forty Eight Lacs Fifty Eight Thousand Nine Hundred Forty Six Only)</b> aser 09.03.2023 nü nungi tenzüka tetemlok aser tanga charges tem meshitsü. Sen apur dang Section 13 kübok sub-section (8) dak ajemdaker atakzüka aliba mapang kiojen/ali meyipa agitsü jacker.</p>	
<p><b>Kiojen/alia terasa:</b></p>	
<p>3500 Sq. Ft., House No. 40, Kenouzou Hill, Kohima, Nagaland-797001.</p>	
<p>Arrotsü yamai alitsü <b>East:</b> Jonah Rengma, <b>West:</b> Nalla, <b>North:</b> Khonlo Magh, <b>South:</b> H Hesso.</p>	
<p>Date: 13th March 2023 Place: Kohima</p>	
<p>Authorised Officer Bank of Baroda, Naga Bazar Branch</p>	



## TIR YIMYIM YIMOBILEM (EDITORIAL)

DIMAPUR RASEMNÜ, METSÜREMI (MARCH) 15, 2022

### Asenoki akoktsü

**A**senoki asen lima nung taküm kuma election ochishia shitak agitsü kanga merangogo, saka tebilemba amato masü tesem kar nungbo azü tokshiba lendong atalok, kar nungbo kiojen raksaa raratep, karbo senso nungi agien aser ano vote agütsüba anogo nunga tesem aika nung tashiyim agi yimkong meyong vote kari dang ajen aser nisung aikati tangar aika meyong 'proxy vote' agütsü. Ano, tesem aika nung election temaka raratep manener. Item meshitak aser tashiyim mapa ajakji angati masü sen agi inyakba mapatem lir, anungji candidate teimbaka, taoba election dang nungi taküm kum election nungsa sen teimba endokogo. Iba jagi asenoki "Clean Election" indang jembiba, inyakba aser sarasademba ajak tamakok angu ama tezüdanga bilemer. Ajsüaka, election shitak ochishia aginertem asoshi ibai tamakok masü, takok angutsü tetenzüker asütsü, kechiyong ochimashi aser tashiyim anema nokdakba tongpang ano matem. Aji oda, takok mesüra tamakokjibo tatem nung dang metettsü aser kechi mapa nung südirsüaka ochibo ochi agidang akoktsü. Iba tangatetba nung Ochiba Election asoshi ano tesashiba raratsü mulungtetdi. Atangji, tanü asen lima nung election ochishia magitetba ya Yisu dak mamangba agia masü mesüra pei lima memeimba agia masü saka kechisüdirsüaka, metemsüyonga, yimten yimsüsür kümnüba agi, iba mendenji sen agi alitsü merangba aser makamaitba agi sen agi pei temeten ayokba ajanga ataloker. Tetezü mangatetba agi masü saka angatetter mapa kuma meinyaktetba aser sensakba agi ochishia melitetba tebilemstütem lir. Aji oda, sensakba agi pei temeten dena senyong ayoktsüsa asenok lira, asenokji sensosanger rongnung züngsemtsü metemsü, kechiyong pei yimten temeten sen yong ayokba nisungjibo senso tajung ka mekümtet. Iba nisungba jagibo pei yimten temeten dang masü saka sen yong pei yimkong yoka achitsü. Kasaji sen agi alia tatar yimsüsür akümbajia shitakba yimsüsür masü taila yimsüsür asütsü. Iba ama asenoki angateter mapa kuma meinyaktetba aser sensakba agi ochishia melitetba timtem ya koktettsü asoshi tamasa asenok ya mapa agi sayutetba tamanger, arogo nunger, aser kazüa melii meranga inyakba senso kaka asütsü tim. Ibaji asenok asoshi tasak masü. Asenok dak Tsüngrem tsübuba agi ochimashi aser tashiyim mapa meinyaktetba tangatetba shisatsü alitsüla aser pei temeten tangar dang ayoktsüabajibo yutsür tangar dang meshimetsüa chiyongtsü asoshi akseta bilemba shisatsü alitsüla. Tang yabo asenoki tashiyim amshia sen agi yimsüsür menden alia amentsüba ya konang amai bilemer aser election nung pei vote sen yong ayoktsü maker. Ajsüaka, kodang asenoki asen taküm mapang tatsüka alima nung alitsü Tsüngremi yokba nükjidong angatettsü merangdir, asenoki asenoksasa nübortem ashiokja yimsüsütsü mesüra pei vote yoka chiyonga alitsü atema yokbabo masüa ta angatettsü. Iba tangatetba jagi asenoki election ochishia magitetba tongpang ya akoktsü. Kodang asenoki asen taküm alima nung aliba nükjidong aser tetezü angatetdir, küm ishika iba lima nung alidang pei temeten yokabo melinütsü aser tashiyim amshiba ochimashi yimsüsürbo mekümnütsü. Alima nung ya shiba südir süang, kechi aküm ta masü saka kechi inyak ta asübaang agitsü. Aji oda, yimsüsür tulur akümyonga Tsüngrem aser nübortem asoshi inyakba tsüngnep kecha mekara, kechi sütsü? Aji oda, tanü asen lima nung election nung takok anguba takok ya masü saka election ochishia magitetba madak takok angutsüsa inyaktetbajiang asenok ajak asoshi shitakba takok asütsü. Iba takok angutsüji ana nung dang lir. Ibaji asenok asoshi tasak masü, kechiyong asenok ajak Yisu Khrista dak amangertem, tetezü Ochi dak amangertem aser pei lima meimba tangatet senso tajungtem lir. Aji oda, asenoki amangba aser angatetba mapa kuma inyaksüabajiang tangar teyari menügdaker saka asensasa mulungtetter inyaksüba dang lir. Aji oda, asen taküm nung Clean Election tongpang akoktsü aser makoktsüba ya asen mulung, ni kokra ajak akoktsü ta bilemdi.

## OLEMSABANG

### AOTSÜR AOR-I KANGA AROKAROKA SHISADANGTSÜ OLEN KAR LEMSATEPER

~ L. Kika Pongener.

Tawa asen Naga lima nung General Election agia tempangogo. Election agiba mapang asen Aotsür Aor-ia koda-ka shilem agi, aji asenok ajak tenuki ngua ajangshia aruogo. Akhi putu ama masü tanübo 'Social Media' ajanga kinuk-kisang ka nung kechi ataloker, aji second-minute tsüngda nung alima ajunga sunga-adoker. Aji oda, asen Ao lima nung kechisa inyakogo aser atalokogo, aji alima ajungai sadakjema metetogo. Election mapang Ao lima nung atalokbatem bilemdangra, asenok tangar dang numamedangtettsüsa mapa aika inyaktepogo. Aji oda, tashitemeteter lima ka memesuk meinyaktsüyim mapa aikasa inyaktepogo. Anungji tima ta bilemra, tarutsü nungbo Election dak sentakba mapa nung, kechi telemtetba agidir, itemji yak-yakta 'Social Media' nung mesangdongi asen sasep nung kechi teinyaktsü lir, aji ajemajema inyaknung tajungba asütsü. Aji oda, 'Social Media' nung yak-yakta osangtsüsang prokshiba yagi alima matsüngdang tejak metentettsüsa aiben denjir. Ajiser, tim-tesu agi inyakba dak alaka, tali-tapong tashiyim inyaktepa, sensosanger tsüngda nung putu aika mamatettsüsa tako-tasen chitepa inyaktepa yabo melenshitsu. Tawa agiba Election nung-to, kanga tesasatsüka aser kanga taaktsüka, Khristan yimsu mezüng agizükba lima...Aser tangar kin-i 'Samanir' ta ajaba lima nung, Election matongdang nungi raratepa tenzükba, karbo senso temeden agienba tashia atalokogo, yi taluposa jemogo, taluposa yoktepogo, senyong vote yoktepogo, proxy vote yitepogo, polling station coup sutepogo, supokrem amshitepogo, tashiyim inyaktepogo aser nisunga tepsetogo.

Ano tesem kar nungbo Candidate dang ozü yimer, ozü meposanger, ozü telok, ozü zünger aser ozü kibong nem sen merijang/lakh/crore paikaji agüjang ta odi-odia jenjang ataker karibo meshia agir alitsü sudi. Election nung Candidate-tem sen teimtiba endokba District-ji Mokochung District asütsü sudi ta bilemer. Surabangla, Election nung asen vote-yong sen merijang/lakh/crore paikaji jenjang ataker meshia agir, MLA/Minister-ba dangji ano terenlok mapa (Developments) inyakjang/agüjang ta koda ashitsü...??? MLA/Minister-ba jagi terenlok mapaji meinyakyongjia asenoki kechiba meinyaker (?)...ta shitettsü asü meshitettsü...??? Tatishitsü agi...Candidate ka Election nung vote aliba aser tanga mapa nung sen Crore metsü-semer (20-30) shi endoker-ang adok, aser opposition nungang alitsüsa aküm...Surabang pa/la küm pungo MLA inyakdangji sen crore metsü-semserji angutsü asü mangutsü...??? Anungji ibaji asenok ajak khen arokaroka bilemdangdi. Naga nunger tangar kintembo Election mapang kecha balaka tali-tapong Candidate-tem dang sen jenjang ataker meshiba otsü mali. Ajsüaka, asen Aotsür Aor balaka, Election ya aayangtsü lenmang tajung ka amai, sen aatsü aser chidiyungditsüba kanga janrateper. Naga nunger ajak dang Aor-sa kanga sensakba/tim-tatempa sudi ta bilemer. Anungji asen Aotsür Aor dak aketba jakla...Election nunga sen aika meshia achitsü aser adoker külena Development-a meshitsü ta asüba tangatetba yabo melenshidi.

Anungji tang Election nung kechi inyakogo aser atalokogo aji suiadokogo, saka taruba Election nungibo, tima ta bilemra, aser takoktsü lenmang dang lira, senyong vote ayokba, proxy vote agütsüba, polling station coup asüba, sen merijang/lakh/crore paikaji agüjang ta meshiba, raratepba, züktepba, long agi ontepba aser nisung tepsetba, aser pei senso tajung senso temeden agienba, yamala mapa yabo Ao lima nung khenyongi mebenshitsu atema temzüng-ozüng takang kar yanglunung jungdisu ta bilemdanger. Kokrabang, iba mapaji yimtsüng shia nung lanurtemi/kaketshirtemi tongti shilem agia inyaknungang akoktsü sudi ta bilemer. Akhi mapang Ao lima yimtsüngtem nung Nashi aser Ak meshibangi moapu nung metsüba ajanga kima yimdong nung Nashi Scu aser Ak scu agi tesenzü majung aliba, aser latrine moapu nung mena aliba ongken tur amshitsü sayuba, yamala mapa aika kaketshirtemi tsüraburtem aser yimden yimsusurtem nem shisatsü tajung agüja, temzüng-ozüng takang yanglur melenshidaktsüba agi tajungba melenshiba ngua aruogo. Tanüa kaketshirtemi inyakdi sura takoktsü lenmang lir ta bilemer.

Ano asen tetsü taso lima nungi pilar Dimapur ama jila nung Aotsür Aor nungtsüng aika kümogo. Dimapur ama jila tulu nung koba mapang kechi tensa tia ajurutsü meteta makaba putu ka nung, bendang lima alir asünungji, "Sung-long aludang tekapu tendakba amai" Aotsür Aor akümdong asütsü 'Political Leader' karbo alitsüla-a ta angateta, sen nung tenuk meyoki, MLA ka adokdaksüba ya, Dimapur nung alir Aor asoshi mapa tajung ka ta numadanga bilemer. Tang asenok longjemer agiba 'Seat' ya teti asoshi kar jurila atema masü, tarutsü nunga Aotsür Aor tetemsu nubo melentepa ayitsü akok. Ano tang longjemer inyakba amai 'Municipal Election' nunga member karbo adokdaksütsü longjemer inyaktsü bilema alitsüla. Atangji, Dimapur ama jila tulu nung, alima kin tanak-temesung aika meyoktepa alidak, Aotsür Aor nungtsüng paikati, koda masüba mapang akümdong asütsü 'Elected Member' karbosa alitsü kangasa nungdaka kümogo. Ano tawa agiba Election nung Nagatsür ana Hekani Jakhalu & Salhoutuonuo Kruse, tenati Nagatsür rongnungi mezüngbuba MLA kümogo. Anungji Aotsür-ia '33% Reservation Seat' nung masü, saka tebur den kasasa tokteper tenati takok anguba ama takok angutsü asoshi merangtsü ajongshir. Tangari kokra kodaser asen Aotsür-ibo makoktsü...??? Anungji taruba Election nungbo asen Aotsür-a MLA & Municipal member karbo adoktsü imla-a atadi. Aji oda, tawa agiba Election nung asen Ao lima nung kechisa tim masüba mapatem atalokogo, itemji tarutsü nungbo mataloktsü atema kaketshirtemi tongti shilem agia temzüng-ozüng takang kar yanglur inyaktsü asoshi Aotsür Aor ajak dang iba ocet ajanga ayongzüker.

**Iba Olemsabang nung lemsaba ken-o aser shisatsü ya iba ocet züluri  
bilemba ken-o ama tazünger angateta agitsü mepishir**

## Lauren Daigle-i 'Thank God I Do' ken sayaogo



Lauren Daigle

**Metsüremi/March 14, 2023 (Agencies):** Grammy Award anaben ngua alila kentener aser ken zülur Lauren Daigle-i la indang ken tasenba "Thank God I Do" sayaogo aser la tenüing jalokja aliba kensep tasenba Lauren Daigle ya May 12, 2023 nü sayatsü sangdong.

"Thank God I Do" ya multi-platinum selling artist aser mera tasen ka lir, shibai taoba ita Centricity Music den ka sür Atlantic Records nung ken atenba sangdonga liasü.

Lauren Daigle kensep nung Grammy Award angur producer Mike Elizondo (Twenty One Pilots, Mary J. Blige, Fiona Apple, Carrie Underwood), aser co-writers Natalie Hemby, Shane McAnally, Amy Wadge, Lori McKenna, Jason Ingram aser Jon Greene nungertem lir.

Lauren Daigle kensep nung ken 20 lir aser ibai part ana lemsar sayatsü. Mezüingbuba ken ter ya May 12 nung aser tanüingba ken ter ya küm tatemlen sayatsü.

"Ibai kü atema senti project ka lir," ta lai ashi.

Lauren Daigle ola ya kanga tashi tulu, ken ajanga otsü tajung ashir.

La indang ken ya billion ka dang tali stream süogo aser ano la sabur tali züina akumer.

Grammy Award anguba, platinum-certified 2018 kensep Look Up Child sayaba sülen Billboard nung Lauren Daigle ya teti angur. Top 200 Albums chart nung Look Up Child ya No. 3 nung alidang Billboard indang Pop aser Christian Album charts nung Top 10 tongtetba tetsür kentener la mezüingbuba akum.

La indang kensep ya Top

Christian Album charts nung hopta 100 tashi No. 1 nung liasü, aser ibajia otsü tasen ka liasü. Kasaji "You Say" ken ya Billboard chart nung No. 1 nung talangtiba liasü.

Lauren Daigle ya Lake Charles, Louisiana nung aso, shibai Grammy anaben, Billboard Music Award tenetben, American Music Award pezüben aser GMA Dove Music Award terben ngua lir.

Daigle-i music education ajungketba nung mapang indoker, timtem nung aliba lanurtem asoshi inyaker, tanurtem aser teintet rogotem anepalur. Lai 2018 küm tentetba The Price Fund ajanga tanü tashinung alima nung tajangzük mebushiba lokti tentet 40 shi nem sen million \$2.4 dak tema agütsüogo.

## ANO GO ABEN TSÜNGREM DEN

### TENÜNG KA !

T. Ken 72:12-20

"Pa tenüing tatem makai temjentsü; anü ali tashi Pa tenüing maneni alitsü: aser nisungtem Pa dak moatsü; kin ajaki Pa dang tepela ta ajatsü" (t.17). Ibai ken züluba tetenzükabajibo Solomon indang zülü saka tekong 17 nungji noksa asenoki angur.

Iba yagi Pa tenüingtem indang jembir. "Na Pa tenüing Yisu ta ajatsü, kechiaser pai pei nübur parnok temenen nungi kümzüksü" (Matt. 1:21). Pa tenüing tetezüji- Kümtdakba. Ibai kechi koma tenüing ka? Ibai teti aliba: "Pa tenüing teti alitsü" (t.17). Asenok meimchir shiba südir süang, taküm alidang ajaki metet ama alitsü, saka kodang südir, yakta pa/la tenüing amadoker. Saka Yisubo kodanga mamadoker. Pa teti aliba tenüing ka lir, "meimchir ajak dang temaba tenüing" (Fil. 2:9).

Yisuji ano temoatsüba tenüing lir. "Nisungtemi Pa tenüing moatsütsü." Tenüing karibo temoatsü bena marur- parnoki atak atem bener arur. Atangji nai ner chir tenüing "Yihuda" majatsü mesüra ner jala "Jezebel" majatsü. Saka Yisu tenüingji temoatsüba tenüing lir. Iba yagi temoatsü bener arur. "Asenok tanela temoatsü agi Yisu Khrista nung moatsü" (Ef. 1:3).

Pa tenüing temoatsüba tenüing. "Kibuba Tsüngrem, Israel Tsüngrem temoatsüba liang" (t.18). Tesüngmangtsü mapa inyaksü asoshi Tsüngremi Yisu Khrista ajanga asenok moatsür. Tenyartem tebang nung Yisu Khrista aliba asenok T. Mapa kakat nung angur. "Nazaret nung Yisu Khrista tenüing nung noktakang aser jajaang" (3:6). Pa tenüing metettsü koda maongka tulu. Asenoki Pa tenüing nung sarasademtsü aser tenzük kechi koma tashi (authority).

Yisu ama tangar mali. Iba ain aser tashi agi sünga lir. Shirnoki Pa tenüing metet parnok nem temoatsü aser takok bener arutsür. Nai Yisu ne Kümtdakba ta meteta lir ma? (Shibaisa Kibuba tenüing nung jadiri kümzüksü) Rom 10:13.

## Indonesia nung Muslim nungeri Khristanpur tekülem ki yangluba nokdang

**Surabaya, Metsüremi/March 14 (Agencies):** Indonesia northeast tsütsü Borneo Island kübok yimtsüing ka nung arogo kati tekülem ki yangluba Muslim nungertemi nokdang, ta osang ajanga ashir.

North Kalimantan Province kübok Tarakan City anasa Selumit yimtsüing nung lenirtemi February 28 nü shiti ka züluba nung Mawar Sharon Christian Church ajanga ki yanglutsü sentong yangluba ya sorkar ozüing anema lir, kechiaser iba ki ya Muslim Tidung kin timba aliba tesem nung lir ta shia liasü.

Indonesian Christian Student Movement (Gerakan Mahasiswa Kristen Indonesia, mesüra GMKI), Region VI Chapter indang coordinator Kristianto Triwibowo S.Pi-i ashiba agi, iba tenokdangba ya

Indonesian constitution nung mela aliba ama masü aser linük tangatetba Pancasila den mapet, koba Indonesia nung nisung balala telungjem nung lidaktsütsü sorkari renemba sentong lir.

"Sorkari nisung ajak nem pei molungba tamangba yimsü amangtsü temeden agüja lir. Mawar Sharon Church (GMS) mapa nokdangtsü melena asenok kati ka dak tatok agütsütsüla aser tangatetep nung alitsüla," ta Kristianto-i March 7 nü sangdong ka nung ashi.

GMKI ajanga North Kalimantan aser Tarakan City sorkar den Ministry of Religion aser state agency balala dang Ministry of Religion den register süa aliba arogo inyakyim kumzüka ayutsü ajungshia liasü.

East Java Province nung

Malang Regency arogoi Sumberejo village, Gedangan Sub-District nung ki ka yangluba mezüingbo Muslim nungeri temi nokdanga liasü saka iba ki maneni yanglutsü temeden nguogo.

Sumberejo Nahdlatul Ulama (NU) branch züingsem temi East Java Christian Church (Gereja Kristen Jawi Wetan, mesüra GKJW) yangluba nokdangtsü asoshi January 20 nü shiti ka züluba sülen Sumberejo village head Abdul Rohman-i tenokdangba agüja liasü. Iba arogo nung kibong 20 lir, ta GKJW Supreme Council mendenpuba Rev. Natael Hermawan Prianto-i ashi.

NU branch shiti nung yangji aliba Muslim nungeri tesendaktep tajung alitsü aser nüburtem tiptema aser anisüingzüka alitsü mechi

kisüba nokdangtsü shia liasü. kumdaktsür.

Pastor Natael-i iba ken o dak sendaktepa aliba telok balala ayongtepa ken o angatettepdaktsü aser Malang Regency Interreligious Communication Forum (Forum Komunikasi Umat Beragama, mesüra FKUB) densema jembishinüba ajanga March 6 nü tangatetep kati aru aser ki asütsü mela, ta ashi.

"Tekülem ki maneni yanglutsü," ta pai ashi.

Indonesia nung tekülem ki yanglutsü atema temelaba agitsü mapa kanga tasak lir aser Khristanpur aser danga tamangba yimsü atema iba amala ki yangluba nung tetsükdaktsü ajurur, ta temeden asoshi nokdaker temi ashir.

Indonesia indang Joint Ministerial Decree of 2006 ajanga arogo tasentem temelaba agitsü tamakoktsü

kumdaktsür.

Tekülem ki ka yanglutsü atema arogo züingsem 90 nungi meyongnem agütsütsüla aser danga tamangba yimsü amanger kilen 60 nungi molungtsüla, saka itemji abensa liaka ketdangtsür temi menudaktsür mesüra temolung magütsür. Muslim nungeri temi miima dangartem dang rara mesütsü ajungshir.

Khristanpur yariba tentet Open Doors ajanga alima nung

Khristanpur aitsü asoshi tamajungtiba linük 50 asadangba 2023 World Watch List nung Indonesia ya jenjang 33 buba nung lir. Indonesia nung conservative Islamic yimyatem tali amshir aser evangelistic outreach mapa inyakba arogo tem dak Islamic extremist telok temi tenük yoker, ta Open Doors ajanga ashir.

AO OSHI ANGAZÜKDAK:

TANÜ ANGAZÜKTSÜBA OJANG

Pensep

(v) mi agi runga aliba sepdaktsü (put out fire)

\* Lanurtemi oa mirok mi pensep.

Pensep

(v) tekong lu tanabuba küm modong ajak lepdoka inyakba mapa (removal of straw and weeds for second year jhumming)

\* Alu rozüker külen kinunger ajak pensepi ao.



OLONG PAITEP # 6456

Grid for OLONG PAITEP # 6456 with numbers 1-17 in various positions.

TIPIEN

- 1. Nisung jenti - (5)
4. Tsük rudenba - (5)
6. Temzüng tesashi - (5)
8. S \_ \_ \_ i - (3)
9. Nisung telemsa - (3)
10. Anogoshi - (4)
12. Ajanga aor - (4)
13. Tsük rizüngdak - (3)
14. Tebang nungi adokba - (3)
16. Süngdong tatembangtiba - (5)
17. Meputep - (5)

LANGTSÜNGLEN

- 1. Tenük telong - (9)
2. Committee dang ajar - (5)
3. Yagi ki okdoker - (7)
5. Yim lenmang - (5)
7. Temoatsü keter meyipa aruba - (9)
11. Kanga junga menemba - (7)
12. Majinü - (5)
13. Tzüma nung senzüba - (5)

OLONG PAITEP # 6455 TELANGZÜBA

TIPIEN :

- 2. Bangsemo, 6. Tiptem, 8. Jen, 9. Talilla, 11. Aren, 12. Tzübo, 14. Alia, 16. Angati, 17. Odi, 18. Azü, 19. Sünglang.

LANGTSÜNGLEN :

- 1. Yipten, 3. Nüja, 4. Sangro, 5. Milen, 7. Tulu, 10. Laza, 11. Aben, 12. Tiyong, 13. Ajizük, 14. Aitsü, 15. Tasa, 16. Aina.



ALOKBAER KIBONG ELECTION SEN AYÜTSÜ SHISABULUR

Alokba : Hai kinungtsü, candidate dang vote alitsü sen five lakh meshiba to ni shinga nema magutsü, aleper ayuji sento aika anungogo, ano asen atemabo 20 lakhs meshiba tobo yamato sur yua lir, ya koda asütsü.

Kinungtsü : Aya mah! Shisabulu tulu, tangbo Arogoi ah election memerukba rongsen bener taru asür, kong ayutsü ah nah.... Ki yangludi asüyonga temolung animesungzük taküm beyond koda alitsü, asen chinur aser semchisemnur tengah olangtsü makatsü.ki oset aser suoshi aliyonga tangari metettsü, koda masü kümogo. Joko obay maliji, asen kiyonger leper alitsü jembidar yangji tengah inoksemdakjang .

Alokba : Aya shidak-a kinungtsü, election nung sen meshia agiba ya kangasa majung-a, anungji tang nungibo aruyaa aliba election nung jibo sen yong masü ochishia asen temeten vote agutsütsü Tsüngrem dang Sarasadema atadi, Aser election nung menaba tai nangzüktsü anogo asemnu tengah prayer centre ka bushia odi, aji masü nungbo asen kibong ya majungtsü.

Kinungtsü : Shidak ah, nasa tabensaba! Lilir : Sungjemienla, Kohima.

Tripura CM Saha-i PM Modi nem tenüngsang agütsür



Agartala, March 14, 2023 (Agencies): Prime Minister Narendra Modi ajanga BJP-i state Assembly elections nung takok angu ta Tripura Chief Minister Manik Saha-i

metetdaktsü "Prime Minister Narendra Modi lenisüba aser Union Home Minister Amit Shah o BJP national president JP Nadda nati meranga inyakba atema pelar" ta CM Saha-i ashi.

PM Modi aser par sorkari Tripura state nung maneni terenlok bentsür arutsü ta nisungtemi meteta lir, ta paisa ashi.

Tripura Assembly election nung BJP-i menden 60 nungi 32 nung takok nguteta liasü.

Election agitsü ita ishika dang lia 2022 küm tatemlen Biplab Deb melena Saha ya Chief Minister inyaktsü shimteta liasü. 2016 küm Saha-i Congress toktür BJP nung aden.

March 2022 nung pa Rajya Sabha nung züngsem ka asütsü shim.

APPSC paper temai adokba ken o nung cadet sub-inspectors 6 apu

Itanagar, March 14, 2023 (Agencies): Arunachal Police-i March 14, 2023 nü Shillong, Meghalaya nung aliba police academy nungi sub-inspector 6 apu. Arunachal Pradesh Public Service Commission (APPSC) paper temai adokba ken o dak sendakba nung parnok apu.

Sub-inspector 6 ya Yon Talom, Pakjum Gamlin, Jembang Darang, Kangkeng Garu, Kaling Jerang aser Kali Yomcha nung ta jangjaogo aser parnok ajak mapa nungi anentsüogo.

March 3 nü Director General of Police, Itanagar indang office nungi tetuyuba ka agütsüba sülen cadet sub-inspector 6 mapa nungi anentsü. Parnoki sorkar ketdangsur ka ama meinyak ta

shidi nung shia lir. "Cadet Sub-Inspector Pakjum Gamlin ya 21/03/2024 tashi probation kübok lir. Pakjum Gamlin mapa nung shimokdang tatemzükba kar liasü aser APPSC paper ken o dak sendakba nung pa ama ozüng amer ka dak tai tonglokja apuba ya kanga majung. Anungji Cadet Sub-Inspector Pakjum Gamlin (U/S) mapa nungi anentsür aser pai anogo 45 tsüngda DIGP(HQ) PHQ Itanagar tsüngdang temepishiba ka benoktsü akok" ta Inspector General of Police, Itanagar-i agütsüba sangdong nung shia lir.

Ano, Arunachal Pradesh Public Service Commission (APPSC) AE paper temai adokba nung temulung melemi bilemba nisung tongti taoba APPSC deputy secretary

shidi nung shia lir. "Cadet Sub-Inspector Pakjum Gamlin ya 21/03/2024 tashi probation kübok lir. Pakjum Gamlin mapa nung shimokdang tatemzükba kar liasü aser APPSC paper ken o dak sendakba nung pa ama ozüng amer ka dak tai tonglokja apuba ya kanga majung. Anungji Cadet Sub-Inspector Pakjum Gamlin (U/S) mapa nungi anentsür aser pai anogo 45 tsüngda DIGP(HQ) PHQ Itanagar tsüngdang temepishiba ka benoktsü akok" ta Inspector General of Police, Itanagar-i agütsüba sangdong nung shia lir.

Taket Jerang dang Yupia indang district and sessions court-i handwriting specimen ka agütsütsü tetuyuba agütsüogo.

Taoba mapang Jerang-i pa indang signature specimen agütsütsü memulung saka okadaki kechi südir süaka agütsütsü tetuyuba metetdaktsüogo.

Taket Jerang aser TGT Obur Jerang na CBI Case No. 2 nung tai tonglokja lir. Tenaprong ya Train Graduate Teacher (TGT) history question paper alia ayokba atema tai tongloktsür.

Obur Jerang ya history TGT lir aser pai Taket Jerang nungi question paper alizük saka junga melangzütet, ta PAJSC züngsem Gyamar Ramesh-i ashi.

Assam sorkari Cabinet sendentem nung Rs 3.68 crore tema endok

Guwahati, March 14, 2023 (Agencies): Assam sorkari September 2021 nungi district 9 nung Cabinet sendentem amendang Rs 3.68 crore tema endokogo ta Minister Ranjeet Kumar Dass-i ashi.

Sen teimtiba endokbaji Dima Hasao district kübok Haflong nung Cabinet senden amendang liasü aser iba nung Rs 1,13,92,399 endok, ta Dass-i ashi.

Congress MLA Kamalakhya Dey Purkayastha-i Assembly nung asüngdangba ka langzüdang General Administration Department minister Dass-i iba osang metetdaktsü.

Bongaigaon nung Rs 55,54,034, Jorhat nung Rs 48,42,173 aser Dibrugarh nung Rs 35,15,912 endok.

Ano, state yimtiba Dispur

aliba Kamrup Metropolitan district nung Cabinet senden amendang Rs 21,79,129 endok, ta Dass-isa metetdaktsü.

Cabinet sendentem nung state senpong nungi Rs 3,68,30,116 endok ta paisa ashi.

Himanta Biswa Sarma-i aniba sorkari September 2021 nungi mapang shia district balala nung Cabinet sendentem mena arur.




All Rabha Students Union (ARSU), All Rabha Women Council (ARWC), Sixth Schedule Demand Committee (SSDC) aser ano Rabha teloktemi Mongulbarnü Kamrup district kübok Boko aser Goalpara district kübok Dudhnai nung lungkak aitba sentongtem ayonga agiogo. Rabha nungeri Sixth Schedule nung Rabha Hasong Autonomous Council (RHAC) dendaktsütsü atema takhangba agütsür.



Office of the MOKOKCHUNG TOWN LONGSA SENSO TELUNGJEM

Mokokchung: 798601

TENÜNGSANG AGÜTSÜR



27 Mokokchung Town Assembly Constituency nungi 14th Nagaland Legislative Assembly atema Shri. Metsubo Jamir (anaben buba) shimtetba asoshi Office of the Mokokchung Town Longsa Senso Telungjem (MTLST) ajanga tenüngsang agütsür.

27 Mokokchung Town A/C nung voters temi Shri. Metsubo Jamir shimba atema MTLST-i tenüngsang agütsür. Nüburtemi imlaba aser mangdang ayuba ama asen leniri Nagaland sorkar nung Cabinet Minister ka ama tenzüksü asen lenir dak temolung lema lir.

Hon'ble Chief Minister of Nagaland, Shri. Nephui Rio-i Shri. Metsubo Jamir dak sempet tajung ajiteta aser temolung lemteta sorkar tasenba nung Minister for Rural Development and SIRD ama cabinet menden lemezüksüba atema MTLST-i pelaba lemsateper. Iba atema MTLST-i Hon'ble Chief Minister dang kanga pelar.

Asen Longsa jabaso Shri. Metsubo Jamir-i tajungtiba nung maneni Naga nunger tenzüksü imla atar. Onoki Tulusang Tsüngrem dang Nagaland Legislative Assembly nung Shri. Metsubo Jamir aser Hon'ble CM-i anir pa den külem tenzüker, MLA aser Minister tem nem shisatsü aser arishi talang moajang ta sarasademtsür.

Ajak dang alia Shri. Metsubo Jamir-i nübur ajungtsü asoshi mapa inyakdang tajungtiba maotsür.

Sd/ (IMTITUBA) President

Sd/ (MOLODONGBA) Secretary

OJA ASER OBA TENA KIBONG KÜMER KÜM 50 AJUNGBA 15 March 1973 - 15 March 2023



Mr. Aoshilu & Mrs. Jongshirenla (Mokokchung Village)

Temeim tsürabur ana kibong kümer küm tenem tashi Tsüngremi Pa kabu manung anir aruba atema Pa nem tenüngsang tulu agütsür.

Tsürbaur taküm onok asoshi akhumdong asütsü ano asen Tulusang Tsüngremi anema aliba den arishi talang moajang ta onoki sarasademtsür.

Temeim Chirnur, Semchirtem aser Anükapang.

MENUNGRA BILEMTETER

Taochisang Tsüngremi Ojala Nem Küm 88 tashi Arishia Iba Akümüli nung Pelatepa Lia Aruba Bilemteter, Aser Kanga Pelar Tsüngrem Tenüng Asanger.



ASÜR MEYAMENLA AIER

Oja, Nai Onok Toktsür Orr Küm Ka Renteta Lia Aruogo Saka Kenü Danga Onoki Na Mebilemteti Süia Meyoki Menungra Lia Aruogo, Maneni Tsüngremi Nü Nüla Awapangangma Ta Sarasademtsür.

~ TEMEIM CHIRNUR, SEMCHIR, ANÜKAPANG ASER KINUNGERTEM.

Mangkolemba Baptist Arogo ajanga Pelaba Sangdonger



Rev. Longrimongla Jamir (Longsa) Mangkolemba Baptist Arogo nung Associate Pastor Women inyaktsü 19th May 2003 nung mapa agizüker küm metsü (20 yrs) buba takok ngua tetenzükdak lia Ao Baptist Arogo Mungdang (ABAM) ajanga 12th March 2023 anogo Ordained sütsüogo. Ordination Council, Rev. Lipok Pongen Convenor, Rev. Dr. A. Tali Ao, Rev. O. Yashi, Rev. Mapula Lemtor, Rev. Dr. Lepden; parnoki timtem anibelem jenti agia mapang shitak nung iba mapa anepalua tempangtsü nung arogoi kanga pelaba lemsateper. Teyanglur Tsüngremi par taküm aser tenzüksüba wadang maneni moajang ta sarasademtsür. Tenzükba wadang tuluba benloker tenzükyonga aodang tenzüker taküm tali moajang ta arogoi sarasadema atar.

Malawi, Mozambique nung yipru lendong nung asür 100 dak tema lir

Blantyre, Mütsüremi/March 14 (Agencies): Cyclone Freddy ajanga Southern Africa mainland tanaben kongshiba sülen Malawi aser Mozambique nung nisung 100 dak tema tepsetogo.

Hopta tatemu iba yipru ya hopta ishika tsüngda tang agi tanabenbuba Southern Africa süia ao. Iba yipru yagi February tatemlen mezüngbuba kongshia liasü.

Malawi nung iba yipru yagi lendong tulu bener arutsüogo aser tzünglu kanga sashia aruba ajanga nüburtem mejanger lia kitem anenzüka aoba sülen nisung 99 süogo.

Iba den nisung 134 yiruogo aser nisung 16 tang tashi monguteti lir. Malawi indang commercial yimtiba Blantyre nung nisung 85 asüba mangaoka lir.

"Lendong nung asürtem timba akümtsü imlar," ta Department of Disaster Management Affairs nung commissioner, Charles Kalemba-i Hombarnü osangbenertem den sensaksemba mapang ashi.

Kidanger Mozambique nunga yipru süiba sülen nisung 10 asü aser nisung 14 yiruogo.

Mozambique National Institute for Disaster Management-i ashiba agi, yipru agi linük tanaben kongshiba ya imlaba dang nungi kanga tamajungba liasü.

UN indang World Meteorological Organization-i ashiba agi, Freddy yipru koba February ita mezüngbuba hopta nung northwestern Australia nung tenzüka liasü, iba ya tropical cyclone tem rongnung talangtiba süshia maoba yipru kümogo. Iba yipru ya southern Indian Ocean ajunga süia ao aser February 21 nü

Madagascar dak kongshi aser iba sülen February 24 nü Mozambique tonga liasü.

Meteorologists temi ashiba agi, tanga mapang nung aiben iba amai mataloker saka Freddy yipru ya Madagascar-i tanaben meyipa ao aser iba sülen ano Mozambique leni oa liasü.

Taoba mapang Southern Indian Ocean ajunga süia aoba yipru anaji Leon-Eline aser Hudah na liasü. Iba yipru ana ya 2000 küm adok.

UN-i ashiba agi, iba yipru ajanga nisung 11,000 dak tema kongshiogo.

Yipru ajanga Malawi tebilemtsü tali kümdaktsüogo. Linük puti otsü nung cholera tashidak tamajungtiba pokteter aliba mapang ka nung tang iba yipru yagi kongshiogo. Iba tashidak yagi taoba küm nungi tang tashi nung nisung 1,600 dak tema süogo.

Tir Lazarus Chakwera-i linük anüolentiplen tensa kanga mejungi akümba sangdongogo. Sorkari iba tensa azüoktsü merangdar aser kasa mapang nung local aser alima kin balala dang tashidak agi kongshir aliba kibongtem nem teyari agütsütsü atema mepeshia arudar, ta pa indang office sangdong ka ajanga metetdaksü.

Linük anüolentiplen district 10 nung Bodhbarnü tashi school shibanga atatsü, kechiyong tzünglu aser mopung agi linük maneni konshitsü imlar.

National carrier Malawi Airlines-i ashiba agi, osang tejangja ka magütsü tashi Blantyre-i aoba tayimtsütem ajak thitsüogo, kechiyong tayimtsü ka tsüngsang kanga majungba ajanga iba yimti metongteti linük yimtiba Lilongwe-i meyipa aotsüsa

aküm.

Linük indang energy utility-ia, electricity generation tanga mapa ama masütsü ta shiogo, kechiyong lishitzü agi turbine tem raksatsütsü ana nung aliba nungi jenbotsü atema hydropower station tem khen atema shibanga ayutsü, ta metetdaksü.

Ali anenzüka aoba sülen Malawi kübok Chilobwe jila nung nüburtemi hadir tangoba tashi aser pei teka teasa amshia lishi nung taküm alirtem kümzüksü atema merangdongogo.

Iba tesem nung alir kati ashiba agi, sorkar tekümüzkertem menor aru.

"Nüburtem tawadakkak makai kümogo aser tensa kanga mejungi lir," ta ambulance driver Honest Chirwa-i ashiba den tekümüzkertem ket nung hadir tapet mali, ta shisem.

Iba jila ya yipru agi kanga mejungi kongshi aser iba ajanga tzümetsüng adokdaksüba den ali anenzüka ao tenzüker koba ajanga kitem anenzüka bener aoba den jila nung alirtem anenbanga liasü.

Malawi nung asürtem ya timba Chilobwe nungi liasü, koba Blantyre yimti anasa tenemtsüng nung amenoka lir.

Ki timba lishi long agi yanglubatem lir aser iba ajanga tsüngsang kanga majungba mapang lendongi aier.

Tropical Cyclone Freddy ajanga Blantyre, Malawi nung tzünglu kanga sashia aruba sülen Blantyre aser Lilongwe yimti sendaktepba lenmang raksar aliba noksa nung angur. Cyclone Freddy yagi tang southern Africa nung tongshia lir aser Honibar aonung iba continent nung tanaben kongshiba sülen Malawi aser Mozambique nung nisung 56 takum samatsüogo.



## Smith lenisüba nung Australia team India den ODI asayatsü



**Metsüremi/March 14, 2023**

**(Agencies):** Steve Smith lenisüba nung maneni Australia team India den ODI asayatsü aliba nung asayatsü. Pat Cummins tetsü taoba ita asüba sülen pai India-i meyipa arur masayatsü atema telemtetba agiba sülen Smith nem iba khuret nongloktüsügo.

India den Test asaya tasembuba asayatsü lia Cummins Australia-i meyipa ao aser Border-Gavaskar Trophy nung tanungba asaya ana nung shilem magitet, koba Ahmedabad nung asaya draw nung tembangba sülen India-i 2-1 agi kokogo.

Cummins maliba mapang Smith lenisüba nung tatembangbuba Test ana asayaago aser pa lenisüba nung par team-i Indore nung test asaya akok. Australia pur Nagpur aser Delhi nung asayabo kanga mejungi

tamakok ngur liasü.

"Mangyim jashi mapang onok mulung Pat aser par kinungertem den dena lir," ta head coach Andrew McDonald-i ashiba ESPN Cricinfo sangdong ka ajanga metetdaksü.

Squad nung Cummins meleni tanga asayar shinga meshim. Jhye Richardson hamstring tanaben yirushiba sülen pa melena Nathan Ellis shimogo.

Smith lenisüba nung Australia team ODI 51 nung asayaer lir.

Fast bowler tem rongnung Cummins aser yiru alisang Josh Hazlewood na dak alaka Australia-i, taküm October-November ita India nung 50-over World Cup asayatsü aliba temulungdang yur iba asayamung atema asayar tajungtibatem shimogo.

"Team liromedema asayatsü

atema onoki sensaksem kar agiogo," ta McDonald-i ashi. "Onoki batter ti asayadaksütsü asoshi sentong yangluogo. Anungji World Cup masaya tsüngda onoki tasa balala benoka asayayonga aotsü," ta paisa ashi.

"Squad nung allrounders aika anisema lir aser parnok team ka nung ajak asayatetsü. Anungji tasüngdangba kar langzütsütsüsa akümtsü."

Taoba küm November ita tetsüng yiruba sülen Maxwell meyipa arutsü, ajisüaka pa kagnga kümdanga anishitsüsa akümtsü.

India den Test asayaba mapang tekatsüla yiruba sülen David Warner taneptsü nguogo aser Mitchell Marsh-a tetsüng teloktep surgery agiba tajungba kümogo. Pa taoba küm T20 World Cup sülen yiruba ajanga home season nung tetsükdaksü adoka liasü.

Test asaya atema meshimba sülen Ashton Agar-a ODI atema India-i aruogo. Tawa tembangba Marsh Cup final nung Western Australia nungi asayaba mapang pai run 64 agütsür wicket 5 agia pa jenang yanglushiogo.

Australia ODI squad: David Warner, Travis Head, Steven Smith (c), Marnus Labuschagne, Mitchell Marsh, Marcus Stoinis, Alex Carey, Glenn Maxwell, Cameron Green, Josh Inglis, Sean Abbott, Ashton Agar, Mitchell Starc, Nathan Ellis, Adam Zampa.

## Afghanistan den T20I asayamung nung Babar Azam masayatsü

**Lahore, Metsüremi/March 14 (Agencies):** Iba ita tatemlen Afghanistan den asayatsü aliba Twenty20 international asayamung atema Pakistan team nung asayatem kar melenshiogo aser captain Babar Azam nem anisüngzük agütsüogo aser pa melena Shadab Khan nem captain mapa bendaksütsü, ta selector temi Hombarnü metetdaksü.

Pakistan aser Afghanistan na tsüngda Sharjah, United Arab Emirates nung March 24, 26 aser 27 nü asaya asem asayatsü. Taoba küm Australia nung Twenty20 World Cup asayaba mapang asayatem teku tashi iba asayamung nung masayatsü. Iba asayamung atema Fakhar Zaman, Shaheen Shah Afridi aser Haris Rauf nung nema anisüngzük agütsüogo.

Shadab lenisüba nung Pakistan team taoba mapanga New Zealand den Twenty20 internationals asem asayaago. Iba mapang Azam yirur liasü aser parnok iba asaya 2-1 agi makok.

Selection committee-i tanga asaya aliba Pakistan Super League nung kanga junga asayaba asayar tasentem team nung aniokogo.

"Ni asayar tejentem den parnok anisüngzükdaksütsü atema tongtepratepogo," ta Pakistan Cricket Board

management committee tekolakba Najam Sethi-i ashi.

"Azam ya onok captain aser kanga tongtibang asayar ka lir.. Pa taruba asayamung nungbo asayaba angutsü," ta pai ashi.

Parnoki Imad Wasim, Azam Khan, Abdullah Shafique aser Faheem Ashraf nung team nung aniokogo.

Imad tatemsa Twenty20 internationals asaya 2021 küm November ita asayaago aser Azam Khan aser Shafique nata asemenben asayaago.

Asayar tasentem rongnung batsmen Saim Ayub, 20, aser Tayyab Tahir, 29 na aser fast bowler . Ihsanullah, 20 aser Zaman Khan, 21 nung densema lir.

Pakistan aser Afghanistan na tsüngda iba ya mezüngbuba bilateral series asütsü.

Iba asayamung atema taoba captain Mohammad Yousuf, head coach aser batting coach asütsü.

Squad: Shadab Khan (captain), Abdullah Shafique, Azam Khan, Faheem Ashraf, Iftikhar Ahmed, Ihsanullah, Imad Wasim, Mohammad Haris, Mohammad Nawaz, Mohammad Wasim, Naseem Shah, Saim Ayub, Shan Masood, Tayyab Tahir, Zaman Khan.

## AIFF-i Tri-Nation asayamung atema asayatem sangdongogo

**Metsüremi/March 14, 2023**

**(Agencies):** India tebur Football team head coach Igor Stimac-i Imphal nung Myanmar aser Kyrgyz Republic den asayatsü aliba Tri-National International Tournament atema asayar 23 agi kümetba provisional squad ka sangdongogo.

AIFF indang Vision 2047 sentong nung shilem ka ama federation-i, international windows mapang India Football team asaya tali nung shilem agidakja India nung asayatem nem maongka tali agütsütsü asoshi telemtetba agiogo.

Khuman Lampak Stadium nung March 22 nung 28 tashi asayatsü aliba asayamung atema Imphal-i mao tsüngda India team Kolkata nung anogo pongu national training camp ka akatsü, ta AIFF-i sangdong ka ajanga metetdaksüogo.

Stimac-i sangdongba asayar 23 agi kümetba provisional squad ya March 15 nü nungi tenzüka Kolkata nung training agütsü.

Asayar 23 nungi 14 Bodhbarnü Stimac den ajuruteptsü aser tanungba asayatem ya March 18nü Fatorda Stadium, Goa nung Bengaluru FC aser ATK Mohun Bagan na ISL final asayaba sülen

March 19 nü camp nung adentsü.

Maneni reserves list nung asayar 11 züngoksema lir, shirnok nungdang nung dang ajatsü. AIFF-isa, ISL final tembangba sülenang iba asayamung atema Imphal-i aotsü asoshi asayar 23 ya sangdongtsü, ta ashi.

### **Provisional squad:**

**Goalkeepers:** Gurpreet Singh Sandhu, Phurba Lachenpa Tempa, Amrinder Singh.

**Defenders:** Sandesh Jhingan, Roshan Singh, Anwar Ali, Akash Mishra, Chinglensana Konsham, Rahul Bheke, Mehtab Singh, Glan Martins.

**Midfielders:** Suresh Wangjam, Rohit Kumar, Anirudh Thapa, Brandon Fernandes, Yasir Mohammad, Ritwik Das, Jeakson Singh, Lallianzuala Chhangte, Bipin Singh.

**Forwards:** Manvir Singh, Sunil Chhetri, Sivasakthi Narayanan.

### **Reserve players' list:**

**Goalkeepers:** Vishal Kaith, Prabhsukhan Gill.

**Defenders:** Subhasish Bose, Pritam Kotal, Asish Rai, Narender Gahlot.

**Midfielders:** Liston Colaco, Nikhil Poojary, Sahal Abdul Samad, Naorem Mahesh Singh. **Forwards:** Ishan Pandita.

## Central Asian Football asayamung atema Russia jaok

**Metsüremi/March 14, 2023**

**(Agencies):** June ita asayatsü aliba mezüngbuba Central Asian Football Association Championships atema linük tenet den Russia-a jaokogo.

Taoba küm February ita Ukraine amak tenzüka sülen European aser FIFA tetoktepba tem nung Russia nem tenokdangba agütsür lir. Ajisüaka Tajikistan Football Association-i Hombarnü sangdong ka ajanga, Russia team taoba Soviet republics Tajikistan, Uzbekistan, Turkmenistan aser Kyrgyzstan nung den külemi regional asayamung tasenba nung shilem agütsü akok ta shiogo.

Iba asayamung atema Afghanistan, Iran aser tanga linüktemi tang tashi osang magütsü lir. Iba asayamung ya Bishkek, Kyrgyzstan aser Tashkent, Uzbekistan nung ayongzüka asayatsü imlar.

Central Asian Football Association ya 2014 küm tentet, koba Asian soccer confederation kübok tesem pong rongnung ka lir aser parnok indang headquarters Tajikistan nung amenoka lir. Parnoki taoba küm CAFA women's championship aser junior championships tem

ayongzüka asayaago.

Tajikistan Football Association-i ashiba agi, Russia-i June ita asayatsü aliba iba tebur asayamung nung shilem agütsü atema maongka agütsüba agizükogo. Ajisüaka Russian Football Union-i state media dang ashiba agi, "iba asayamung nung Russia national team shilem agütsü atema tang sensaksemdar."

Iba jenjang agiba ajanga Russia, Asian Football Confederation (AFC) nung adentsü atema jembishinüba tanaben jembishi tenzüksü, kechiyong parnok international soccer tetoktepba balala nung shilem agütsü atema merangba mapang ka lir.

January ita Russian Football Union tir Alexander Dyukov-i, European football ketdangsürtem den senden amenba sülen December ita AFC nung adentsü amokmerener aliba nungi atsüngina liasü.

Tang tashi nung bangzüng kecha yanglua mali. Taoba ita Dyukov, Bahrain nung AFC Congress nung shilem agiogo aser AFC tir Sheikh Salman bin Ibrahim Al Khalifa den sensaksemogo.

"Onok Russian Federation

aser tanungba European federations tem den tesendaktep tajung lir aser mapang ajak nung parnok den tongtepratepa arudar. Asaya ajungkettsü atema tajungtiba kechi aji aginer aser takok tashi football asaya den yimden yimsüsüba memeyokteptsü meranger," ta Salman-i senden tembangba sülen ashi.

Russia national tebur team 2022 küm Kyrgyzstan, Tajikistan aser Uzbekistan den dang international friendly asem asaya liasü. Parnok iba ita tatemlen Iran aser Iraq den asayatsü lir.

Ukraine nung rara tenzüka sülen Olympic asaya timba ka nung Russia aser Belarus nung asayatem shilem magidaksüi arudar. IOC-i mezüngbo parnok kümzükatoktsütsü atema iba jenjang agütsü tuyu saka tangbo parnok masayadaksüra parnok mesenmetui amshiba ama akümer ta shia arudar.

IOC-i Russia aser Belarus nung asayatem neutral athletes tema ama 2024 Paris Olympics atema qualifying events metenzük tsüngda asayadaksütsü asoshi sentong yangluba anema taoba ita linük 35-i tashishiba ka agütsüogo.

## **BILEMDANGANG**

**"Mapa medeni tangar akaba dang nukshia alirtemi takok mongutettsü."**